



人生愛有好朋友

以早，英國的報紙《The Times》捌出過一個謎猜，閣公開徵求(ting-kiû)答案，題目是：「對倫敦到羅馬，上短的路是啥物？」真濟人拚勢提地圖研究，按照地理位置去揣上近的路，這寡人攏落選，結果著獎的答案煞是：「一个好朋友。」

舊年年尾，我去參加師專同學的聚會，其中有一位致著腦瘤咧做化療的同學嘛有參加。伊毋但戴膨紗帽仔、掛喙罨(tshuì-am)，閣穿一領厚厚的裘仔共虛荏的身軀包牢(tiâu)咧。阮成十个同學輪流共扶插，陪伴伊杳杳仔行，欣賞石門水庫美麗的景致。雖然，受著地球暖化的影響，無看著這改活動的主角——楓仔葉對青變黃轉紅的風采。毋過，看伊瘦卑巴、袂接力的雙跤，有同學的鼓勵佢陪伴，勇敢踏出一步閣一步，雖然毋甘伊予病疼折磨，毋過心肝頭煞感覺真燒烙。

彼暗，逐家做陣聚餐，講天講地、講過去、講未來。講三十外年前，有一个同學暍甲跋落眠床跤，惜面皮驚人知的笑詼代；講彼个教官掌權，學生毋敢 hìn-hainn 的年代，平平是盡心共運動埕的草埔仔沃水，有人是予教官記嘉獎，有人煞衰尾 hǒng 記警告；講翁、講囡、講家庭；講食甲這個歲頭，顧身體較贏顧家伙的重要。落尾，閣約束後過(kuè)同窗會，欲加攢寡笑話通予逐家笑甲梢聲(sau-siann)。原本，做化療荏身命的同學講伊體力穰，無法度坐久，無想著一見著三十年無 khuàinn 的老同學，逐家嘻嘻嘩嘩，彼號自在佢歡喜，煞一暍頭仔擋六點鐘久，嘛無開喙喝忝(huah thiám)。

人生的路途有風嘛有雨，若有好朋友通做伴，同齊來分享快樂，分擔艱苦，快樂自然會加倍，艱苦當然會減少，相信歹天嘛會變好天。有一句話講了真好：「一个人行，行較緊；一陣人行，行較遠。」世間路，有朋友就袂孤單。向望逐家攏會當珍惜友情，快樂就會一攤繼一攤。

作者：林淑期

☆詞彙學習☆

【虛荏】hi-lám：虛弱。

【扶插】hù-tshah：攙扶。

【袂接力】bē tsih-lát：使不了力。

【衰尾】sue-bué：倒楣。

【hìn-hainn】：吭聲。

【歲頭】huè-thâu：歲數、年齡。

☆文法學習☆

【.....煞.....】閩南語「煞」(suh)這個字，不同用法意思不同。(1)結束、停止。例：這齣戲幾點會煞？(2)罷休、算了。例：你若敢騙我，我袂放你煞。(3)竟然，表意外的意思。例：著獎的答案煞是：「一个好朋友。」(4)表示反問，相當於「怎麼」。例：你煞無共我借一千箍。(5)被凶神所困、著魔。例：伊著煞的款。本文的三處用法都是「竟然」的意思。